

այստեղ Ձեզ համար դժուար կը լինի» — ասում է բարեկամ կոմիսարը:

Մեկնե՛լ, մեկնե՛լ...

* * *

— ... Կանչուած եմ ժողովրդական Դատարան:

Գործ թիւ այսինչ: Վերաւորանք միլիցիականին իր պաշտօնը կատարելու ժամանակ, հակախեղափոխական ընթացք: Նուազագոյն պատիժ՝ վեց ամիս բանտարկութիւն:

Ներկայանում եմ դատարանին:

Փաստարան՝ համալսարանի դասախօս Չուբար: Ձեռքին «Մարտակոչ»-ի վերջին թիւը, ուր Մեասնիկեանը «գաղութահայ աշխատաւորութեան» կոչի մէջ յայտարարում է, «որ Հայաստանում սկսուել է նոր ոսկեդարը, ու մենք ուրախ ենք, որ Ձարեանի նման մտաւորականները մեզ հետ աշխատում են»...

Վկաներ՝ նկարիչ Ս-ը, երգիչ Ն-ը եւ կոմունիստ գործիչ Վ-ը:

Փայտէ մաշուած սանդուխներ: Գրեթէ դատարկ մի սրահ, մի քանի նստարաններ եւ փոքրիկ մի սեղան:

Սպասում ենք: Կոմունիստ բարեկամը մտնում է դատաւորների սենեակը եւ վիճարանում: Լսում են հեռաձայնի ձայներ: Կոմունիստ բարեկամը վերադառնում է. հիմա կը դան:

Դատարանը: Ոտքի են կանգնում:

Մէջտեղը կարճահասակ, մօրուքը վաղուց չածիլած, զգեստները թափթփած, աննշան դէմքով մի երիտասարդ: Աջ կողմից բարձրահասակ մի կին, ահագին փորով, մազերը գլխի կատարին ժողովուած, չինական աչքերով: Ձախ կողմից, նոյնպէս կարճահասակ, քիթը ներս ընկած, աչքերը պղծած, բարձր կօշիկներով մի անձնաւորութիւն:

— Դատարանը, — յայտարարում է ցած ձայնով մէջտեղի մարդը, — ձեր գործը որոշում է կրճատել:

— Կրճատե՞լ, — պատասխանում է փաստաբանը, — մենք պահանջում ենք որ լսուի:

— Ձենք կարող, հրամայել են կրճատել:

Դուրսը արեւ է: Օրը պայծառ:

Մարդար աղայի սրճարանում խմում ենք վերջին սուրճը: Մարդար աղան մօրուքը շոյում

է ու նայում Արարատին: Մտածկոտ է եւ տըլտուր:

— Այսօր վերջին օրն է, — ասում է նա, — խանութը փակում է: Էլ ա՛յնքան տուգանք, ա՛յնքան տուգանք... Սմեցէ՛ք, մէկ հատ էլ խմեցէք...

ՀՐԱԺԵՇՏ

Գարուն է նորից: Հին մի տանձենիի կատարին արշալոյսը պայթել է աննիւթական հրարուխի նման:

Մի սարեակ՝ ճիւղի վրայ թառած կտոր այդ ածուխը՝ երգում է: Ճառագայթաթաթախ երկնքի տակ, տեսարանը սարսուռ է: Ձգիտեմ՝ ո՞րտեղից մանուշակի հոտ է դալիս: Սարեակի կտուցը փայլում է եւ բարախում է փոքրիկ իր կոկորդը:

Երգում է: Լայնատարած եւ մոգական դաշտի համար, նոր ծաղկող նշենիների եւ հեռաւոր տարածութիւնների համար: Գարնանային առաւօտները հանգիստ են եւ պայծառ: Ու սարեակի այդ երգը հանգիստ է եւ լուսաւոր:

Սաղայն, տխուր է սիրտս: Հրաժեշտի այս բոպէին ամբողջ հայրենի իմ երկիրը սարեակի հետ երգում է սրտիս մէջ: Ո՞վ է իմանում, կարելի է վերջին անգամ:

Ձեմ ուզում ոչ մի բանի մասին մտածել: Լաւ է լուսաւոր առաւօտեան այս վերջին ողջոյնը, լա՛ւ է մանիշակի հոտը եւ լա՛ւ են դարնան մէջ դղրդող աղբիւրների եւ ջրվէժների ձայները:

Այնտեղ Արադածը եւ Արարատը աղամանդէ արեւների նման լուսաւորում են դաշտ եւ սար, եւ Հայոց երկիրը աւելի քան երբեք հնչուն եւ պայծառ:

Եւ ես, վերջին անգամ, եկել եմ մութալու մի քիչ լոյս եւ մի քիչ երգ, որպէսզի անցորդի իմ նոր ճամբաներիս վրայ երազը ապրի տեւական եւ յիշատակը ամուր կեանքով:

Երախտապարտ եմ աչքերիս մէջ ամբարած արծաթէ տեսիլքների համար, սրտիս մէջ մխրճուած բոլոր յոյգերի համար, մսերիս մէջ թրթռացող եւ ուղեղիս ծալքերի մէջ դրոշմուած ապրումների եւ հէքեթային երազանքների համար:

Երախտապարտ եմ, ո՞ր իմ երկիր, քո հասցրած ցաւի եւ վէրքերի համար...